



Monsieur Fernand Etgen
Präsident vun der Chamber

Lëtzebuerg, den 19. Dezember 2022

Här Präsident,

sou wéi den Artikel 80 vum Chambersreglement et virgesäit, bieden echlech, dës parlamentaresch Fro un den Här Minister fir Educatioun, Kanner a Jugend weiderzeleeden.

Engem rezenten Artikel an der geschriwwener Press no, huet déi gratis Kannerbetreiung en direkten Impakt op d'Aarbecht vun den Dageselteren. Mat der Aféierung vum Bildungsoptag am Joer 2017, an dernieft der Aféierung vun der gratis Kannerbetreiung an de Maison Relais, huet d'Attraktivitéit vun den Dageseltere considerabel ofgeholl. Hier Zuel ass déi lescht Jore staark zeréckgaangen. Dëst Joer gi manner wéi 5% vu Kanner mat enger Prise en charge am Kader vum Chèque-service accueil vun Dageseltere betreit.

An dësem Kontext, géing ech dem Här Minister fir Educatioun, Kanner a Jugend gär folgend Froe stellen:

- Wat fir eng Roll sollen Dageselteren an Zukunft an der Ausféierung vun der nationaler non-formaler Bildung spillen?
- Wéini ass déi ugekënnegt Käschtanalys vum Accueil bei den Dageselteren ofgeschloss ?
- Huet den Här Minister vir, op Basis vun dëser Analys, de Plaffong vun der maximaler staatlecher Participatioun eropzesetzen? Wa jo, wier deen Ament d'Zill, eng gratis Betreiung bei Dageselteren mat enger adequater Remuneratioun vun den Dageselteren anzeféieren?
- Wéi stellt sech den Här Minister am Fall vun enger gratis Betreiung eng adequat Remuneratioun vun den Dageseltere vir ?
- Wëll den Här Minister de Statut vun den Dageselteren anescht reegelen? Wa jo, wéi eng Piste kommen duerfir a Fro?

Mat déiwem Respekt,

Francine Closener
Deputéiert



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 7392 vun der honorabeler Deputéiert Francine Closener

Ad 1)

D'Regierung verflucht sech am Regierungsprogramm, fir all Forme vu Betreierung ze fërderen. Dageseltere sinn eng wichteg Offer an der Landschaft vun der Kannerbetreierung a sinn a bleiwen e wichtegen Acteur vun der non-formaler Bildung zu Lëtzebuerg.

Et läit der Regierung um Häerz, d'Diversitéit vun der Offer a besonnesch och d'Struktur vun den Dageseltere bäizebehalen an och auszebauen, fir esou op d'Besoine vun de Kanner an hiren Elteren anzegoen.

Ad 2)

Fir d'Diversitéit ze erhalen a fir den Accueil en famille ze valoriséieren, gouf zesumme mat de betroffenen Acteuren (Agence Dageselteren a Verrieder vun Dageselteren) en ëmfaassenden Analys- a Reflexiounsprozess gefouert. Dës Analys ass ofgeschloss.

Ad 3) a 4)

Fir d'Attraktivitéit vun der Funktioun vun den Dageselteren ze erhéijen, gouf en entspreichende Gesetzestext ausgeschafft, deen demnächst dem dem Regierungsrat virgeluecht gëtt.

Wat d'Gratuitéit vun der Betreierung vun de Schoulkanner während der Schoulzäit ubelaangt, esou ass ze bemierken, datt dës Gratuitéit, déi zanter der Rentrée 2022/23 a Kraaft ass, och fir Dageseltere gëllt. Während de Gratisstonnen iwwerhëlt de Staat den Deel vun den Eltere bis zu engem Plafong vun 3,75 Euro pro Kand pro Stonn. Gëtt dës Plafong iergendwann eropgesat, da geet dem Staat seng Partizipatioun och erop.

Ad 5)

Am Kader vum Concertatiouns- an Analysprozess, dee gemaach ginn ass, sinn d'Froen iwwert de Statut vun den Dageseltere breet diskutéiert ginn, an no Alternativen zu dem aktuelle Statut vum Independant gesicht ginn. Allerdéngs werft d'Ausübung vun der Aktivitéit als Salaré eng ganz Rei vun arbeitsrechtleche Froen op, déi bis elo nach net geléist konnte ginn. D'Regierung fokusséiert sech dofir aktuell op eng Valoriséierung vun de Missiounen vun den Dageselteren ënnert dem aktuelle Statut.

Lëtzebuerg, de 17. Januar 2023

De Minister fir Educatioun,
Kanner a Jugend

(s.) Claude MEISCH